

DOMENIE I DI AVENT

Antifone di jentrade cf. Sal 24,1-3

A ti, Signôr, o alci la mê anime,
Diu gno, o met in te la mê sperance: che no mi tocji di pintîmi.
Che no vedin di sghignê ducj i miei nemîs.
Chei che a sperin in te no restaran deludûts.

No si dîs Glorie a Diu.

Colete

Diu onipotent,
dàur ai tiei fedêi di lâi incuintri cu lis oparis de justizie
al to Crist che al sta rivant,
par podê sentâsi a la sô diestre e gjoldi il ream dai cîi.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Is 63,16-17.19; 64,2-7

Se tu sbregassis i cîi e tu vignissis jù!

Dal libri dal profete Isaie
Tu, Signôr, tu sês nestri pari;
“Nestri redentôr par simpri” al è il to non.
Parcè nus fasistu straviâ, Signôr,
lontans des tôs stradis,
indurissistu il nestri cûr, che cussì no ti tem?
Torne pal amôr dai tiei servidôrs
e des tribûs de tô ereditât!
Se tu sbregassis i cîi e tu vignissis jù!
Lis monts, denant di te, si scjassaressin.
Parcè che tu tu fasis robis tremendis
che nô no ses spietavin,
e che dai timps di une volte nissun nol à mai sintût.
Orele no à sintût,
voli nol à viodût
un Diu, fûr di te, che al fasi cussì
par chel che al sta fidât sun lui.
Tu tu ur vâs incuintri a di chei che a metin in vore la justizie,
e che si impensin des tôs stradis;
ve, tu jeris inrabiât e nô o vin pecjât,
dopo mai che si sin rebelâts cuintri di te.
Ducj nô o jerin tant che une robe soce,
ducj i nestris ats di justizie tant che un peçot sporc.
Ducj nô si sin inflamâts come lis fueis,
e lis nestris inicuitâts nus menin vie come l’aiar.
Nol è nissun che al clami il to non,
che al jevi sù par poiâsi tor di te,
parcè che tu nus âs platade la tô muse,
tu nus âs metûts tes sgrifis des nestris colpîs.
Cun dut a chest, Signôr, tu tu sês il nestri pari;

nô o sin l'arzile e tu chel che nus à poleâts;
nô ducj o sin vore de tô man.
Peraule di Diu.

SALM RESPONSORIÂL dal Salm 79

R. Fâs lusî la tô muse e salvinus, Signôr.

Tu, pastôr di Israel, scolte,
tu che tu sês sentât sui cherubins, mostre il to sflandôr!
Torne a dismovi dute la tô fuarce
e ven in nestri jutori. **R.**

Diu des schiriis, torne,
cjale jù dal cîl e viôt,
ven a viodi di chest vignâl,
dal zardin che e à plantât la tô diestre,
dal risit che par te tu âs coltât. **R.**

Che la tô man si poi sul om de tô diestre,
sul fi dal om che tu ti âs nudrît.
Di te no si slontanarìn mai altri;
tu nus fasarâs vivi e o clamarìn il to non in jutori. **R.**

SECONDE LETURE 1 Cor 1,3-9

O spietìn la manifestazion dal Signôr nestri Jesù Crist.

De prime letare di san Pauli apuestul ai Corints

Fradis, grazie a vualtris e pâs di Diu nestri Pari e dal Signôr Jesù Crist.

O ringracii di un continui il gno Diu par vualtris, pe grazie di Diu che us è stade dade in Crist Jesù,
parcè che in lui o sês diventâts siôrs di ogni robe, di ogni peraule e sience.

Di fat la testimoniance di Crist si è tant rinsaldade fra di vualtris che no us mancje plui nissun don,
intant che o spietais la manifestazion dal Signôr nestri Jesù Crist.

Lui us tignarà salts fin tal ultin, cence colpe di sorte te di dal Signôr nestri Jesù Crist: parcè che chel
Diu che us à clamâts a la comunion cun so Fi Jesù Crist nestri Signôr al è di peraule.

Peraule di Diu.

CJANT AL VANZELI Sal 84,8

R. Aleluia, aleluia.

Mostrinus, Signôr, la tô misericordie
e danus la tô salvece.

R. Aleluia.

VANZELI Mc 13,33-37

Veglait, dal moment che no savêts cuant che il paron di cjase al rivarà.

Dal vanzeli seont Marc

In chê volte, Jesù al disè ai siei dissepui: «Stait atents, veglait, parcè che no savêts cuant che al sarà
il moment. Al sarà come un che, partint par un viaç lunc, al à lassade la sô cjase dant ogni podê ai
siei servidôrs, a ognidun la sô vore, e al paratonâr i à ordenât di veglâ. Veglait alore, dal moment
che no savêts cuant che il paron di cjase al rivarà, se sore sere o a miezegnot, se sul cjant dal gjal o a
buinore. Che lui, cuant che al torne a colp, no us cjati indurmidîts. E ce che us dîs a vualtris, ur al
dîs a ducj: Veglait!».

Peraule dal Signôr.

Si dîs O crôt.

Su lis ufiertis

Acete, Signôr, i regâi che ti presentin
e che ju vin vûts de tô bontât
e fâs che al deventi un premi di redenzion eterne
ce che tu nus lassis fâ cun devozion in cheste vite.
Par Crist nestri Signôr.

Antifone a la comunion Sal 84,13

Il Signôr nus darà ogni ben di sorte
e e butarà il so prodot la nestre tiere.

Daspò de comunion

Che nus zovin, Signôr, i misteris che o vin celebrâts,
e nus insegnin, a nô pelegrins su la tiere,
a volê ben a lis realtâts dal cîl
e a restâ grampâts dome a chês che a durin par simpri.
Par Crist nestri Signôr.